

VENDIM
Nr. 39, datë 9.12.2015

PËR MIRATIMIN E POLITIKËS TARIFORE PËR SHËRBIMIN E FURNIZIMIT ME UJË DHE LARGIMIT E PËRPUNIMIT TË UJËRAVE TË NDOTURA
(ndryshuar me vendimin nr. 22, datë 24.4.2019)

Në zbatim të neneve 14 dhe nenit 22, pika 1, të ligjit nr. 8102, datë 28.3.1996, “Për kuadrin rregullator të sektorit të furnizimit me ujë dhe largimit e përpunimit të ujërave të ndotura”, i ndryshuar, Komisioni Kombëtar Rregullator

VENDOSI:

1. Të miratojë politikën tarifore për shërbimin e furnizimit me ujë dhe largimit e përpunimit të ujërave të ndotura, e detyrueshme të zbatohet nga të gjithë operatorët që ofrojnë këto shërbime, sipas tekstit bashkëlidhur këtij vendimi dhe pjesë e pandarë e tij.

2. Objektivi i Entit Rregullator të Ujit (ERRU) nëpërmjet politikës së vendosjes së tarifave për shërbimin e furnizimit me ujë dhe largimin e përpunimin e ujërave të ndotura është:

- Të mbrojë konsumatorët;
- T’u bëjë të mundur të licencuarve të rikuperojnë kostot e arsyeshme të kryerjes së një shërbimi efektiv, duke përfshirë dhe mundësinë për të siguruar një fitim mbi investimin e tij, që është i mjaftueshëm për përmirësime dhe ndërtime të reja;
- Të inkurajojë efikasitetin në operacionet e brendshme, duke bërë të mundur rritjen e fitimit financiar të të licencuarit nëpërmjet rritjes së të ardhurave bruto nga reduktimi i humbjeve joteknike apo i uljes së kostove të shërbimit, me kusht që i licencuari të përmbushë të gjitha kërkesat e licencës së tij në lidhje me kryerjen dhe cilësinë e shërbimit dhe kërkesa të tjera të aplikueshme kontraktuese;
- Të inkurajojë efikasitetin ekonomik brenda sektorit, duke dhënë sinjale të sakta të çmimeve në lidhje me ofertën e tepërt apo të pakët;
- Të pasqyrojë hapur dhe qartë subvencionet e dhëna nga qeveria;
- Të pasqyrojë ndryshimet në kosto dhe në aspekte të tjera midis klasave të klientëve dhe llojeve të shërbimit, në varësi të subvencioneve që do të aplikohen;
- T’u japë mundësi të licencuarve të respektojnë ligjet për mbrojtjen e mjedisit.

3. Niveli i tarifës bazohet në politikën tarifore dhe përcaktohet sipas metodologjisë “Për vendosjen e tarifave për shërbimin e furnizimit me ujë dhe largimin e përpunimin e ujërave të ndotura”, miratuar nga ERU-ja.

4. Bazë për vlerësimin e aplikimit për nivelin e tarifës së shërbimeve ujësjellës-kanalizime është metodologjia “Për vendosjen e tarifave” dhe “Justifikimi i nivelit të kërkuar të tarifës - Modeli i aplikimit”, të cilat përgatiten sipas një procesi, manualeve përkatëse për përdoruesit dhe dokumenteve tip të përgatitura dhe vënë në dispozicion për operatorët nga ERU-ja.

5. Vendimi i KKRR-së nr. 28, datë 28.9.2011, “Për miratimin e metodologjisë për vendosjen e tarifave”, shfuqizohet.

Ky vendim hyn në fuqi menjëherë.

KRYETARI
Avni Dervishi

POLITIKA TARIFORE
PËR SHËRBIMIN E FURNIZIMIT ME UJË DHE LARGIMIN E PËRPUNIMIT E UJËRAVE
TË NDOTURA

Misioni i Entit Rregullator të Ujit (ERRU) është t'u garantojë konsumatorëve shqiptarë shërbime furnizimi me ujë dhe kanalizimesh cilësore, efeciente dhe me çmim të drejtë. Tarifat janë vendimtare për arritjen e këtij ekuilibri, si edhe për zhvillimin e qëndrueshëm të sektorit në tërësi. Mandati i ERRU-së i përcaktuar në ligjin nr. 8102, datë 28.3.1996, i ndryshuar, është mbrojtja e konsumatorëve duke vendosur stimuj që inkurajojnë efikasitetin dhe përmirësimet e ofrimit të shërbimit të konsumatorëve, por dhe duke u mundësuar operatorëve mbulimin e të gjitha kostove të arsyeshme që lindin nga ofrimi i këtyre shërbimeve.

KREU 1

POLITIKA PËR VENDOSJEN E TARIFËS PËR OFRIMIN E SHËRBIMIT TË FURNIZIMIT
ME UJË DHE LARGIMIT E PËRPUNIMIT TË UJËRAVE TË NDOTURA

Neni 1

Përkufizime

(hequr fjalë në përkufizimin “ent privat” dhe shtuar fjalë në përkufizimin “Konsumator publik” me vendimin nr. 22, datë 24.4.2019)

“Enti Rregullator i Ujit (ERRU)” është institucioni i pavarur që rregullon sektorin e furnizimit me ujë, të largimit dhe të përpunimit të ujërave të ndotura në përputhje me ligjin nr. 8102 (i ndryshuar).

“Komisioni” është Komisioni Kombëtar Rregullator që udhëheq Entin Rregullator të Ujit që funksionon në bazë të ligjit nr. 8102 (i ndryshuar).

“Konsumatorë” janë të gjitha kategoritë familjare, publike dhe private të cilat përdorin shërbimet e furnizimit me ujë dhe/ose kanalizimeve.

“Konsumator publik, si dhe Rezidentat Studentore Publike” nënkupton çdo person/subjekt ligjor të klasifikuar si autoritet qeveritar, autoritet lokal, organizatë ndërkombëtare (ambasada, konsullata dhe rezidenca diplomatike), selitë e partive politike dhe degëve të tyre, si dhe çdo institucion i cili kryen aktivitet me interes të përbashkët ose publik që nuk është regjistruar si organizatë fitimprurëse.

“Ente private” nënkupton çdo person/ subjekt ligjor ose organizatë fitimprurëse që ushtron veprimtari tregtare apo industriale të çfarëdolloji përfshi edhe shoqëritë tregtare shtetërore (KESH sh.a., e të tjera të ngjashme).

“Operator” është subjekti i licencuar nga ERRU-ja që ushtron aktivitetet e shërbimit të furnizimit me ujë, largimit e të përpunimit të ujërave të ndotura dhe ofron një ose disa nga këto shërbime sipas kategorive të përcaktuara në licencë.

“Zona e juridiksionit” është zona ku operatori i licencuar është përgjegjës të ofrojë shërbimin e furnizimit me ujë dhe kanalizime.

“Sistemi i furnizimit me ujë” përbëhet nga tërësia e elementeve, si vepra e marrjes, sistemi i pompave, njësitë e dezinfektimit, rezervuarët, linjat e transmetimit dhe rrjeti shpërndarës.

“Sistemi i kanalizimeve” është sistemi që përbëhet nga tërësia e elementeve, si linjat e shkarkimit/grumbullimit të ujërave të ndotura, linjat e largimit dhe/ose stacionet e pompimit të ujërave të ndotura, veprat e shkarkimit të tyre në trupat ujorë pritës, si dhe impiantet e trajtimit të ujërave të ndotura (nëse sistemi është i pajisur me to).

“Shërbimet UK” është tërësia e shërbimeve të kryera nga operatorët te konsumatorët përmes sistemeve të furnizimit me ujë, si dhe sistemeve të grumbullimit, largimit dhe/ose trajtimit të ujërave të ndotura.

“Sistemi i tarifave” nënkupton parametrat, kriteret dhe standardet e përdorura për përcaktimin e

tarifës për shërbimin e furnizimit me ujë dhe kanalizime për kategori të ndryshme konsumatorësh dhe nivele të ndryshme konsumi.

“Faktorët e strukturës së tarifës” i referohen peshës relative të tarifës së dhënë për njësinë e volumit të konsumit të ujit ndërmjet grupeve të ndryshme të konsumatorëve dhe niveleve të ndryshme të konsumit.

“Tarifa e ujit” është çmimi që konsumatorët duhet të paguajnë për shërbimin e furnizimit me ujë të ofruar nga operatorët nëpërmjet rrjetit shpërndarës. I njëjti term përdoret zakonisht edhe për tarifën e kanalizimeve (grumbullimin, largimin e përpunimin e ujërave të ndotura). Tarifa e ujit të pijshëm dhe kanalizimeve vendosen për të mbuluar koston e prodhimit, trajtimit të ujit, depozitimin dhe shpërndarjes së tij te konsumatorët, grumbullimin, largimin dhe trajtimin e ujërave të ndotura, si edhe faturimin dhe mbledhjen e të ardhurave nga këto shërbime.

“Tarifa me dy pjesë” përbëhet nga komponenti volumetrik dhe nga komponenti fiks i tarifës. Komponenti volumetrik përcaktohet si çmim/m³. Komponenti fiks i tarifës është një çmim fiks në vit ose në muaj. Tarifa me dy pjesë mund të aplikohet vetëm në rastet kur matësit janë të instaluar dhe lexohen. Përndryshe aplikohet një “tarifë aforfe”.

“Tarifë për shërbime të tjera” është termi i përdorur për të gjitha shërbimet e tjera të ofruara nga operatori, të cilat nuk janë pjesë e faturimit të shërbimit të furnizimit me ujë dhe kanalizime, por që duhet të paguhet nga konsumatori.

“Shitja e ujit me shumicë” është situata në të cilën uji shitet te një blerës nga një ose disa pika shpërndarjeje me qëllimin e rishitjes së tij për konsumatorët individualë brenda zonës së shërbimit të blerësit me shumicë.

“Tarifë mesatare” është mesatarja që rezulton nga totali i të ardhurave sipas volumit të faturuar me tarifën e kombinuara (tarifë volumetrike + tarifë fikse/tarifë e sheshtë), mbi totalin e volumit të faturuar, për një afat kohor (muaj/tremujor ose vit).

“Të ardhurat” nënkuptojnë çdo vlerë monetare të grumbulluar nga operatorët për shërbimet e ofruara në vitin për të cilin flasim. Kur ERRU-ja analizon nëse kostot janë mbuluar nga të ardhurat kjo gjithmonë nënkupton që të ardhurat shtesë dhe subvencionet janë marrë në konsideratë.

“Mbulimi i plotë i kostos” do të thotë që kostot e operatorit për shërbimin e furnizimit me ujë dhe kanalizime mbulohen plotësisht nga faturimet/arkëtimet e shërbimeve të klientëve.

KREU 2

SISTEMI I TARIFAVE TË SHËRBIMEVE UJËSJELLËS-KANALIZIME DHE TARIFAT PËR SHËRBIME TË TJERA

Neni 2

Objektivat e politikës së tarifave

Operatorët zgjedhin strukturën e tarifave, duke pasur parasysh realizimin e objektivave të politikës tarifore si vijon:

a) Mbulimi i kostos. Struktura e përzgjedhur e tarifave duhet të sigurojë mbulimin e kostove të shërbimeve, nëpërmjet së cilës të ardhurat i tejkalojnë kostot. Operatorët, duhet të rrisin nivelin e arkëtimit hap pas hapi deri sa të arrihet mbulimi i plotë i kostove:

- i) të ardhurat mbulojnë kostot e plota operative dhe të mirëmbajtjes;
- ii) të ardhurat mbulojnë kostot operative dhe të mirëmbajtjes, si dhe amortizimin;
- iii) të ardhurat mbulojnë kostot operative dhe të mirëmbajtjes, amortizimin, fondin rezervë për planin afatmesëm/afatgjatë për realizimin e shpenzimeve kapitale, si edhe shërbimin e borxhit nëse investimet janë realizuar me anë të huas.

b) Efikasiteti menaxhues. Mbulimi i kostos duhet të arrihet përmes përpjekjeve sistematike për të ulur kostot e shërbimit duke rritur efikasitetin menaxhues dhe teknik; duke ulur humbjet e ujit në sistem; duke

ulur lidhjet e paligjshme; dhe duke rritur të ardhurat nëpërmjet përmirësimit të normës së arkëtimit. Vlerësimi i arritjeve në përmirësimin e performancës teknike dhe financiare të operatorëve do të shqyrtohet nga ERRU-ja përpara miratimit të ndryshimit të tarifave.

c) Përballueshmëria. Në përputhje edhe me standardet ndërkombëtare¹, gjatë përcaktimit të strukturës së tarifave, ERRU-ja duhet të ketë parasysh aplikimin e një strukture tarifash të përballueshme për nevojat bazë të konsumit për konsumatorët me të ardhura të ulëta, veçanërisht për ato zona ku skemat e subvencioneve ende nuk janë përcaktuar.

Në mënyrë që tarifatat të jenë të përballueshme për konsumatorët, ERRU-ja gjatë përcaktimit të tarifave për çdo operator, mban gjithmonë parasysh që fatura e llogaritur me tarifatat e reja të aprovuara nga KKRR-ja për shërbimin e furnizimit me ujë dhe kanalizime, për konsumatorët familjarë në zonën e shërbimit të operatorit, nuk duhet të kalojë 5% të të ardhurave të tyre mesatare².

d) Efikasiteti mjedisor. Struktura e tarifave duhet të përcaktojë tarifa më të larta, për konsumatorët me nivel të lartë konsumi me qëllim inkurajimin e ruajtjes së burimeve dhe një niveli konsumi të qëndrueshëm, duke pasur parasysh edhe çështjet mjedisore.

Neni 3

Elementet kryesore të politikës tarifore

1. Tarifatat për shërbimet e ofruara nga operatorët (furnizimin me ujë, largimin e përpunimin e ujërave të ndotura) përcaktohen mbi bazën e kostove të këtyre shërbimeve. Kostot dhe të ardhurat për secilin prej shërbimeve duhet të regjistrohen më vete. Më shumë detaje do të jepen në udhëzimin për kontabilitetin e kostos.

2. Tarifatat duhet të jenë uniforme në zonën e shërbimit të operatorit. Në kushtet kur një zonë e re bëhet pjesë e zonës së shërbimit të operatorit dhe tarifatat e aplikuar në këtë zonë janë më të ulëta/të larta se tarifatat aktuale të operatorit, unifikimi i tarifave mund të bëhet gradualisht brenda një periudhe të caktuar (jo më shumë se tre vjet), në varësi të plotësimit të standardeve të shërbimit.

3. Konsumatorët që përfitojnë shërbimet e ofruara nga operatorët kategorizohen:

- a) familjarë;
- b) publikë;
- c) privatë;
- d) shitje uji me shumicë.

4. Në rastet kur konsumatorët janë të pajisur me matës aplikohet tarifa me dy pjesë. Komponenti fiks në një tarifë me dy pjesë përgjithësisht mbulon kostot fikse. Kurse komponenti i ndryshueshëm përgjithësisht duhet të mbulojë kostot variabël.

5. Në rastin kur një operator i furnizimit me ujë përballet me probleme që kanë të bëjnë me cilësinë ose me sasinë e ujit, komponenti volumetrik i tarifës mund të jetë më i lartë sesa vetëm kostot variabël. Një komponent i tillë mund të stimulojë konsumatorët për të kursyer ujin.

6. Në këndvështrim afatmesëm, kostot e shërbimit të furnizimit me ujë duhet të shpërndahen ndërmjet grupeve të ndryshme të konsumatorëve, veçanërisht në rastin kur nuk ekziston një skemë subvencionesh për familjet me të ardhura të ulëta. Komponenti volumetrik i tarifës do të rritet paralelisht me rritjen e konsumit.

7. Në periudhën afatgjatë, subvencionimi i kryqëzuar ndërmjet shërbimeve apo ndërmjet kategorive të klientëve duhet të evitohet.

¹ Shqipëria ka njohur zyrtarisht këto standarde të të drejtave të njeriut përmes bashkësponsorizimit të Rezolutës së Kombeve të Bashkuara (UN) mbi të Drejtat e Njeriut për Ujë të Pijshëm dhe Kanalizime, në Këshillin e të Drejtave të Njeriut, më 24 mars 2011.

²Të ardhurat mesatare të konsumatorëve familjarë merret nga të dhënat e publikuara nga INSTAT-i.

8. Kostot për shërbimin e largimit e përpunimit të ujërave të ndotura ndahen ndërmjet grupeve të ndryshme të konsumatorëve në bazë të volumit të ujit të konsumuar. Tarifatat do të ndjekin ritëm progresiv në varësi të volumit të konsumuar dhe të shkarkuar. Për ndotësit problematikë (që shkaktojnë ndotje të rënda)³ do të vihet një tarifë shtesë për ujërat e ndotura. Komponenti fikse në përgjithësi mbulon kostot fikse.

Neni 4

Llogaritja e kostove

1. Kostot llogariten bazuar në regjistrat kontabël të shoqërisë, të cilat janë të hartuar sipas Sistemit Kombëtar të Kontabilitetit. Për periudha afatmesme, operatorët duhet t'i llogarisin kostot nga të dhënat e kostos historike për çdo element shërbimi të marrë nga sistemi i kostos akruale⁴ dhe nga kosto në bazë të aktivitetit⁵.

2. Kostot fikse për leximin e matësve, faturimin, arkëtimin dhe shpenzimet adminis-trative do të llogariten mbi bazën e kostove aktuale të secilit komponent. Kostot e përgjith-shme për zyrat, administratën, shërbimet ligjore dhe personelit do të përfshihen në kostot fikse.

3. Kostot e operimit dhe mirëmbajtjes (O&M), që lidhen me vëllimin e prodhimit dhe shpërndarjes së ujit, si dhe largimin e përpunimit të ujërave të ndotura llogariten nga kostot aktuale: energji elektrike, kimikate, inventarë, shpenzime për personelin, transport etj., për të ofruar këto shërbime të konsumatorët sipas standardeve të pranueshme.

4. Kostot për blerjen e ujit me shumicë janë të përfshira në tarifën për njësi të paguar nga operatori.

5. Amortizimi do të llogaritet çdo vit.

6. Interesi për shërbimin e borxhit nëse investimet janë realizuar me anë të huas (shlyerja e principalit dhe kreditë përkatëse sipas skemës së amortizimit të rënë dakord me bankën huadhënëse) është pjesë e kostos që merret në analizë gjatë vlerësimit të tarifës.

7. Detajet do të jepen në metodologjinë për vendosjen e tarifave të shërbimit të furnizimit me ujë dhe largimit e përpunimit të ujërave të ndotura si edhe në udhëzimin për kontabilitetin e kostos, të miratuar nga ERRU-ja.

Neni 5

Struktura e tarifave dhe modeli i miratuar nga ERRU-ja

1. Struktura e tarifave përshkruan se si kosto të ndryshme të shërbimeve të ujësjellës-kanalizimeve shpërndahen sipas kategorive të konsumatorëve. Ajo pasqyron se sa paguan (në total) secila kategori konsumatorësh për këto shërbime.

2. Struktura e tarifave mund të përdoret nga operatorët për hartimin e një strategjie për të vendosur një tarifë të përballeshme për nevojat bazë të konsumit për familjet me të ardhura të ulëta, veçanërisht nëse nuk ekziston një skemë subvencionesh funksionale.

3. Për konsumatorët me matës, ERRU-ja do të kërkojë aplikimin e “tarifës me dy pjesë”, ku:

a) Pjesa e tarifës që mbulon kostot fikse; kjo do t'i faturohet konsumatorit nëpërmjet një komponenti mujor “tarifë fikse”;

b) Pjesa që mbulon kostot variabël: do t'i faturohet konsumatorit nëpërmjet një komponenti mujor “tarifë volumetrike”.

³ Ndotës problematikë konsiderohen subjektet që shkaktojnë ndotje nga kryerja e proceseve kimike dhe teknologjike prodhimi.

⁴ Regjistrimi kontabël sipas metodës akruale (nga anglishtja “accrual”) është një matje e performancës dhe pozicionit financiar të kompanisë që njih ngjarjen dhe aktivitetin ekonomik menjëherë (që në momentin e zotimit) pavarësisht se kur ndodh në të vërtetë transaksioni (arkëtimi ose pagesa) monetar.

⁵ Kostot e llogaritura për çdo aktivitet (prodhim, shpërndarje, grumbullim, largim e përpunim të ujërave të ndotura).

Tarifa me dy pjesë ndihmon për të siguruar se operatori nuk i përcakton shumë poshtë ose shumë lart kostot fikse, nëse volumet e shitjes ose lidhjet e konsumatorëve të tij janë të ndryshme nga ajo çfarë është parashikuar. Konsumi i ujit për të gjithë konsumatorët duhet të matet. Kur operatorët nuk e kanë arritur ende këtë objektiv, ata duhet të propozojnë një tarifë fikse mujore për konsumatorët pa matës (konsumatorët që nuk përdorin matës) dhe duhet të planifikojnë të kalojnë 100% në matje të konsumit. Shpjegime të detajuara në lidhje me llogaritjen e tarifës për konsumatorët me matës jepen në metodologjinë për vendosjen e tarifave.

4. Për konsumatorët pa matës duhet aplikuar një “tarifë aforfe”. Kjo tarifë duhet të përcaktohet në nivel të tillë që të stimulojë konsumatorët të pajisen me matës. Detaje të mëtejshme jepen në metodologjinë për vendosjen e tarifave.

5. Struktura e tarifave propozohet nga operatori dhe miratohet nga ERRU-ja. Propozimi për ndryshimin e tarifave për periudhën e përcaktuar në aplikimin për ndryshimin e tarifave, duhet të pasqyrojë hapat e mëposhtëm:

a) Llogaritjen e të ardhurave që nevojiten për të arritur nivelin e mbulimit të kostos sipas miratimit nga ERRU-ja;

b) Vlerësimin e një “tarifë për nevojat bazë të konsumit” për familjet me të ardhura të ulëta, në qoftë se është e aplikueshme;

c) Propozimin e strukturës tarifore për arritjen e objektivave të politikës tarifore dhe përcaktimin e komponentëve fiks dhe volumetrikë sipas llojit të konsumatorëve dhe në qoftë se kërkohet edhe niveleve të konsumit.

KREU 3

PROPOZIMI PËR NDRYSHIMIN E TARIFAVE DHE PROCESI I MIRATIMIT TË TARIFAVE

Neni 6

Çështje të përgjithshme

1. Vetëm operatorët e licencuar mund të aplikojnë për miratim tarife.

2. Sipas ligjit nr. 8102 (i ndryshuar), neni 22, pika 3: “Asnjë tarifë apo pjesë e saj nuk mund të modifikohet më shumë se një herë brenda vitit”.

3. Propozimi për ndryshimin e tarifave plotësohet dhe paraqitet nga operatorët duke respektuar kërkesat dhe afatet kohore të përcaktuara në ligjin nr. 8102 (i ndryshuar), si dhe në aktet nënligjore të miratuara me vendim të KKRR-së.

4. Një operator mund të aplikojë për tarifa të reja jo vetëm për një vit, por edhe për një interval kohor 2–5 vjet, nëse ka një plan biznesi afatmesëm për periudhën e kërkuar. Në këtë rast, skema e tarifave do të parashikojë një ndryshim progresiv gradual vjetor të tarifës për periudhën në shqyrtim me qëllim shmangien e rritjeve të mëdha. Ky ndryshim gradual mund të përdoret për të mbuluar ndikimet e inflacionit.

5. Në bazë të planit të biznesit, ERRU-ja është në gjendje të vendosë mbi ndryshimin gradual të tarifave, mbështetur në treguesit kryesorë të performancës të vendosur me operatorin. Rritja e tarifave lejohet vetëm me parakushtin që operatori të arrijë objektivat e performancës. Tarifat, gjithashtu, mund të ndryshohen dhe për vitin e dytë dhe/ose të tretë duke marrë parasysh diferencën ndërmjet subvencioneve të parashikuara dhe atyre të marra aktualisht për periudhën në shqyrtim.

6. ERRU-ja harton, miraton dhe informon operatorët UK në lidhje me detaje të procesit dhe procedurës së aplikimit për tarifa të reja për shërbimet: ujë i pijshëm, grumbullim, largim dhe përpunimin e ujërave të ndotura.

7. ERRU-ja përgatit gjithë dokumentacionin dhe instrumentet e nevojshme në ndihmë të operatorëve për miratimin e nivelit të tarifave për shërbimet që ofrojnë operatorët dhe i publikon,

shpërndan, si edhe trajnon përdoruesit për të kontribuar në rregullimin sa më të mirë të sektorit të furnizimit me ujë dhe kanalizime.

Neni 7

Pagesa rregullatore

1. Pagesa rregullatore është detyrim vjetor për t'u paguar nga operatorët. ERRU-ja me miratimin e tarifave përcakton për çdo operator pagesën e rregullimit njofton operatorin dhe lidh kontratën me të brenda 30 ditëve nga data e njoftimit. Operatori duhet të kenë shlyer pagesën rregullatore të përcaktuar në kontratë përpara paraqitjes së aplikimit për nivel të ri të tarifave për shërbimet që ai ofron.

2. Komisioni Kombëtar Rregullator, çdo vit në muajin shtator, do të vendosë dhe do të publikojë përqindjen e pagesës rregullatore që do të aplikohet për vitin në vazhdim.

Neni 8

Procesi i miratimit të tarifave

1. Procedura e aplikimit fillon me paraqitjen e kërkesës nga operatori për ndryshimin e tarifave.

2. Kërkesa për ndryshim të tarifës, e paraqitur nga operatori, bazohet në analizën teknike-ekonomike (apo planin e biznesit) për shkaqet e ndryshimit të tarifave për shërbimet që ai ofron.

3. Përpara paraqitjes së aplikimit për ndryshimin e tarifave pranë Entit Rregullator, operatori bazuar në këtë analizë (plan biznesi), i paraqet kërkesën për miratimin e ndryshimit të tarifave organeve drejtuese të shoqërisë, pronarit, si dhe organizon seancën dëgjimore me publikun (bazuar në udhëzimin përkatës).

Neni 9

Dokumentacioni i aplikimit

1. ERRU-ja, bazuar në kërkesat ligjore, si dhe për të pasur një vendimmarrje sa më të drejtë në lidhje me propozimin për nivelin e ri të tarifave për shërbimet që ofrojnë operatorët përcakton dhe miraton një listë dokumentesh mbështetës.

2. Mungesa e një prej dokumenteve bën që propozimi për ndryshim tarife të mos shqyrtohet nga ERRU-ja.

3. ERRU-ja, për të analizuar dhe vlerësuar propozimin për ndryshimin e tarifave të paraqitur nga operatorët, mund të përdorë të dhëna zyrtare që lidhen me veprimtarinë e operatorëve, të grumbulluara nga institucione të tjera publike. Këto të dhëna do të përdoren, gjithashtu, për të analizuar dhe vlerësuar objektivat e performancës që janë caktuar operatorëve nga ERRU-ja.

4. ERRU-ja në bazë të ligjit nr. 8102 (i ndryshuar), kur e gjykon të arsyeshme, kryen inspektime për të verifikuar të dhënat e paraqitura nga operatori.

KREU 4

ZBATIMI DHE MONITORIMI I TARIFAVE

Neni 10

Zbatimi i tarifave

Operatori i njofton konsumatorët një muaj më parë për rritjen e tarifës. Operatori i njofton konsumatorët duke bërë njoftime në shtypin apo mediet lokale, duke përfshirë një shënim dhe në faturën e ujit të konsumatorit. Operatori, brenda orarit zyrtar të punës, vë në dispozicion të konsumatorëve dokumentacionin për tarifën aktuale. Operatori, publikon në vende të ndryshme ku ka akses publiku,

vendimin për ndryshimin e tarifave, por duke mos u kufizuar vetëm në pikat ose zyrat e tij të marrëdhënieve me konsumatorin.

Neni 11

Monitorimi i zbatimit të tarifave

ERRU-ja monitoron zbatimin e tarifave të miratuara me vendim të KKRR-së. Nëse ERRU-ja konstaton se operatori zbaton një tarifë që është mbi tarifën e ndryshuar e të miratuar prej saj, do të zbatojë dënimet për kundërvajtje, të përcaktuara në nenin 32/1, pika b, të ligjit nr. 8102 (i ndryshuar). Në rast se operatori ka vënë tarifë më të lartë për konsumatorët, ai do të korrigjojë tarifën në ciklin pasues të faturimit dhe do të rimbursojë shumën e vënë mbi tarifën e rregullt të miratuar nga ERRU-ja për çdo konsumator të prekur nga aplikimi i parregullt i tarifës së ndryshuar të miratuar.